

gement d'air, & fut embaumé pour estre porté à l'Empereur qui estoit à Rome. Il s'est assez veu de monstres conformes à ce portrait, desquels sera encore parlé cy apres. Il est escrit qu'à Verone l'an 1254. fut veu vn poulain, nay avec vne teste d'homme.

4.

LA quatrieme & derniere medalle de ceste planche, est Romaine, l'inscription du reuers, qui est de Quintus Titus, ou Titius, Triumvir monetaire, comme on peut penser. Sebastiano Erizzo Italien, dit que ceste face de ce personnage barbu, avec deux petites ailes aux deux costez de la teste, ayant vn diadème comme les autres dieux, est Terminus. Les auteurs font mention de Terminus, auquel Numa Pompilius dressa vn temple à Rome. Denys Halicarnasse parlant dudit Roy Numa, nomme aussi Iupiter, Terminal. Et de fait, aux Termes faits de marbre ou autre pierre, souuent s'accommodoit la teste de Iupiter, pource dit Terminal. Et *Terminalia* à Rome estoient les festes de ce beau Dieu Terminus, duquel ne parlerons dauantage, pource qu'auons desia fait mention des termes, bornes & limites propres à distinguer les champs & autres possessions.

Le reuers a vn Pegasus, ou cheual volant, qui est aussi monstreux que le cheual precedent à face humaine. Pegasus (disent les fables) fut cheual ailé, procréé du sang de Meduse, lequel comme s'en fut volé sur le mont Helicon (mont sacré à Apollo & aux Muses) frappant de son pied sur le roc fit sortir vne fontaine, qui de ce fut nommée Hippocrene, c'est à dire, fontaine caballine. Iceluy beuuant en la fontaine Corinthienne, dictée Pyrene, fut prins par Bellerophon, pour se seruir de luy à l'entreprinse qu'il auoit contre la Chimere, laquelle, monté sur ledit cheual, il surmonta facilement. Or Bellerophon enflé de ses beaux faits, ou bien ennuyé de tant demeurer sur la terre, desiroit monter au ciel avec ce cheual ailé: mais ne peut iouir de son entreprinse, & secoux par le cheual retomba en terre, retenu neantmoins ledit cheual au ciel, où il fut colloqué par Iupiter entre les astres, regardant le cercle Arctique, touchant la teste du Dauphin, & ayant presque sur son col la main dextre du Verseau, autrement dit Aquarius. Ce Pegasus se rapporte coutumierement aux Muses & aux Poètes qui dependent d'icelles, pour la raison susdite. Toutesfois il signifie autrement celerité & vifesse: car outre les ailes par lesquelles celerité nous est denotée, le cheual de soy mesme est symbole & indice de soudaineté, legereté & celerité, tât en cours qu'en autres actions. Mesmes les anciens

Pegasus, cheual ailé.